

Մելիք Հովսեփյան

ՍՓՅՈՒՌՔԱՀԱՅՈՒԹՅԱՆ ՀԵՏ ՄՇԱԿՈՒԹԱՅԻՆ ԿԱՊԻ ԿՈՄԻՏԵԻ ՀԱՄԱԳՈՐԾԱԿՑՈՒԹՅՈՒՆԸ ԼԻՔԱՆԱՆԻ ՀԱՅ ՀԱՄԱՅՆՔԻ ՀԵՏ (1964-1985 թթ.)

Քանայի քառեր. Կոմիտե, սփյուռքահայություն, լիբանանահայ համայնք, օգնություն, կապեր, փոխայցեր, ուսում, հանգիստ, բուժում, գործընկեր:

ՄՈՒՏՔ. ԼԻՔԱՆԱՆԱՀԱՅ ՀԱՄԱՅՆՔԻ ՆԵՐՔԻՆ ՈՒ ԱՐՏԱՔԻՆ ԴՐՈՒԹՅՈՒՆԸ 1964-1985 ԹԹ.

Կոմիտեի գործունեության տարիները համընկան Լիբանանում երկարամյա քաղաքացիական պատերազմի հետ (1975-1990 թթ.), որի պայմաններում այդ երկրի հայաշատ համայնքը ենթարկվում էր ծանր ցնցումների: Նախկինում խոսել ենք Մերձավոր Արևելքում Կոմիտեի գործունեության կազմակերպական, գաղափարաբանական, համայնքում տիրող իրավիճակից բխող և տարածաշրջանային-քաղաքական լարված իրադրությունից առաջացած խնդիրների մասին¹: Նման խնդիրներն առնչվում էին Կոմիտեի իրավասություններին, համայնքներում նրա գործունեության սահմանափակումներին, այդ գործունեության քաղաքական առաջնահերթություններին, ինչպես նաև տարածաշրջանում ժամանակ առ ժամանակ բռնկվող պատերազմներին: Նշվածի համատեքստում Լիբանանի հայ համայնքը բացառություն չէր, ավելին, հենց նա էր նշված խնդիրներից առաջացած հետևանքներին ամբողջապես և ուղղակի առերեսվողը:

ԼԻՔԱՆԱՆԻ ՀԱՅ ՀԱՄԱՅՆՔՆ ԸՍՏ ԿՈՄԻՏԵԻ ՓՈՍՏԱԹՂԹԵՐԻ

Ըստ խորհրդային տեղեկանքների՝ Լիբանանում հայերի թիվը շուրջ 180 հազար էր, որից հայ լուսավորչականներ՝ 140 հազար, հայ կաթոլիկներ՝ 30 հազար և հայ բողոքականներ (ավետարանականներ)՝ 10 հազար: Նշվում էր նաև, որ Լիբանանում կային նաև ոչ քաղաքացի հայեր՝ շուրջ 60 հազար: Ընդհանուր առմամբ, հայերի թիվը Լիբանանում 1958-1965 թթ. միջակայքում 220-250 հազար էր²: 1983 թ. ևս, ըստ Կոմիտեի տվյալների, հայերի թիվը Լիբանանում գրեթե 250 հազար էր³: Ակնհայտ է, որ 1964-1985 թթ. Լիբանանում բնակվում էր ավելի քան 200 հազար հայ, բայց այդ թիվը մեծապես կրճատվեց քաղաքացիական պատերազմի պատճառով:

Ինչպես և մյուս երկրներում, Լիբանանում ևս հայկական հասարակական-քաղաքական հոսանքները բաժանվում էին «հայրենասիրականների» կամ «առաջադիմականների» (ՍԴՀԿ, ՈԱԿ, ՀԲԸՄ) և «հետադիմականների» (ՀՅԴ և համակիր շրջանակներ): Հետևաբար քննարկվող տեղեկանքներում զգացվում է այլ, հատկապես մշակութային կազմակերպությունների վերաբերյալ տեղեկությունների կարևորումը:

1965 թ. դրությամբ Լիբանանահայ համայնքում Կոմիտեի գործընկերների մեջ ամենաակտիվներից մեկը «Թեքեյան» մշակութային միությունն էր, որ Լիբանանի հայկական մշակութային ամենաբազմամարդ կազմակերպություններից մեկն էր: Այն հիմնադրվել էր 1947 թ. և, ունենալով նյութական ապահովված վիճակ, կազմակերպում էր երաժշտական երեկույթներ, ներկայացումներ, խրախուսում ու աջակցում էր երիտասարդ ստեղծագործողներին: Միությունը լայն աշխատանք էր կատարում լիբանանահայ երիտասարդության ներկայացուցիչներին Խորհրդային Հայաստանի հետ կապելու և Սփյուռքում հայոց լեզուն և հայ մշակույթը պահպանելու ուղղությամբ: Այն ուներ իր

¹ Տե՛ս Հովսեփյան Մ., Մերձավոր Արևելքում Սփյուռքահայության հետ մշակութային կապի կոմիտեի գործունեության որոշ խնդիրների շուրջ (1964-1985 թթ.), «Պատմություն և մշակույթ» հայագիտական հանդես, 2017, էջ 224-229:

² Տե՛ս ՀԱԱ, ֆ. 875, ց. 16, գ. 192, թ. 2-3:

³ Տե՛ս նույն տեղում, ց. 14, գ. 47, թ. 2:

մասնաշենքը, որտեղ գտնվում էին ակունք և ՌԱԿ-ի «Զարթոնք» պարբերականը: Միության հովանավորությամբ Բեյրութում գործում էր նաև առանձին դպրոց:

Լիբանանում գործում էր նաև «Վերծնունդ» մշակութային միությունը, որը ղեկավարում էին անկուսակցական հայեր: Նրանք բարեկամաբար էին տրամադրված Խորհրդային Հայաստանի նկատմամբ: Միությունը կազմակերպում էր մշակութային միջոցառումներ, ինչպես նաև մասնակցում լիբանանահայ համայնքում այլ «առաջադիմական / հայրենասիրական» կազմակերպությունների կողմից անցկացվող միջոցառումներին:

Լիբանանահայ Գրական շրջանակը Լիբանանի հայ երիտասարդ շնորհալի գրողների և արվեստագետների կազմակերպությունն էր, որի կորիզն էին կազմում աչքի ընկնող մի շարք գրողներ: Գրական շրջանակը կազմակերպում էր գեղարվեստական երեկոներ, դասախոսություններ, բանավեճեր, սփյուռքահայ և խորհրդահայ գրողների ստեղծագործությունների քննարկումներ:

Լիբանանի «Նոր սերունդ» մշակութային միության գրական խմբակը միավորում էր հնչակյան գրական երիտասարդությանը և հրատարակում «Արարատ» գրական ամսաթերթը: Վերջինս Գրական շրջանակի հետ միասին կազմակերպում նաև էին համատեղ երեկոներ ու հանդեսներ¹:

Կոմիտեի ստեղծման շրջանում Լիբանանում կար մի քանի տասնյակ հայկական դպրոց 14340 աշակերտներով²:

Համայնքում գործող արվեստագետների թիվը շուրջ 80 էր:

Այնտեղ հրատարակվում էին «Արարատ» (ՍԴՀԿ), «Զարթոնք» (ՌԱԿ) և «Ազդակ» (ՀՅԴ) պարբերականները: Շաբաթաթերթերից կարևոր էին «Կանչ» (հայ կոմունիստներ), «Նաիրի» (գրական-քաղաքական), «Սփյուռք» (գրական-քաղաքական), «Մասիս» (կաթոլիկ համայնք) և «Երիտասարդ հայ» (անհատական) շաբաթաթերթերը, «Բագին» (ՀՅԴ), «Բժիշկ» (Լիբանանահայ բժշկական միություն), «Հասկ» (Մեծի Տանն Կիլիկիո կաթողիկոսություն), «Զանասեր» (ՀԲԸՄ) և «Շիրակ» (Թեքեյան մշակութային միություն) ամսագրերը: Լիբանանում 1960-ական թթ. երկրորդ կեսին գործում էր 55 հայկական դպրոց, որոնցից կաթոլիկ համայնքի հովանու ներքո՝ 9, բողոքական համայնքի հովանու ներքո՝ 12, անհատական՝ 5, իսկ մնացածները գործում էին հայ առաքելական համայնքի հովանավորությամբ³:

Նոր իրավիճակը լիբանանահայ համայնքում: 1980 թ. մի տեղեկանքում (հեղինակներ Լ. Մանասերյան⁴, Մ. Յուզբաշյան⁵, Վ. Համազասպյան⁶) խոսվում է այն մասին, որ Լիբանանի քաղաքացիական պատերազմի ընթացքում հայկական կուսակցությունների միջև ձևավորվեց միասնական ձակատ: ՀՅԴ-ի հեղինակությունը բարձրացել էր այն պատճառով, որ նրա զինված մարտիկները քաղաքացիական պատերազմի ընթացքում հիմնականում իրենց վրա էին վերցրել հայ խաղաղ բնակչության պաշտպանությունը: Արդյունքում ՍԴՀԿ տեղական կառույցը սկսեց ՀՅԴ-ի հետ մերձեցման հակումներ ցուցաբերել: Ի վերջո նույնիսկ նախատեսվեց ստորագրել «Համատեղ գործողությունների համաձայնագիր»: Հնչակյաններն արդեն տեղի են տվել ՀՅԴ-ի հեղինակության առաջ, իսկ ռամկավարները համաձայն չեն որևէ միության մաս կազմելու, եթե այնտեղ դաշնակցականները կարող են գլխավոր դեր ստանալ⁷:

Քննարկելով լիբանանահայ համայնքում ստեղծված վիճակը՝ տեղեկանքի հեղինակները «Ազգային ձակատ»-ի ստեղծումը խորհրդահայ ղեկավարության համար հա-

¹ Տե՛ս նույն տեղում, ց. 1, գ. 41, թ. 30-31:

² Տե՛ս նույն տեղում, թ. 37:

³ Տե՛ս նույն տեղում, ց. 16, գ. 192, թ. 5-6:

⁴ Խորհրդահայ հասարակական-քաղաքական գործիչ, խնդրո առարկա շրջանում Հայաստանի կոմկուսի կենտրոնի ինֆորմացիայի և արտասահմանյան կապերի բաժնի վարիչ:

⁵ 1978-1988 թթ. ՀԽՍՀ պետական անվտանգության կոմիտեի նախագահ:

⁶ 1964-1985 թթ. Սփյուռքահայության հետ մշակութային կապի կոմիտեի նախագահ:

⁷ Տե՛ս «Հայրենիք-սփյուռք. կամրջող անուն՝ Վ. Համազասպյան», կազմ. Ս. Միրզոյան և Մ. Մարտիրոսյան, Ե., 2011, էջ 257-258: Չեկուցագիրը վերահրատարակվել է նաև հետագայում: Տե՛ս «Սփյուռքահայ քաղաքական հոսանքներն ու գաղութները խորհրդային գաղտնի փաստաթուղթերու մէջ (1945-1991, ընտրանի)», կազմեց Գ. Յազըճեան, Ե., 2016, էջ 182-185:

մարում էին անընդունելի և հետապնդած շահերի տեսանկյունից՝ բացասական հետևանքներով լի: Նրանք առաջարկում էին հնչակյաններին համոզել, թե ՀՅԴ-ի հետ մերժեցումը նրանց հեղինակությանը հարված կհասցնի, և հեռու պահել նրանց համաձայնագիր կնքելու մտքից: Միաժամանակ նրանք համոզված էին, որ հարկ է ՌԱԿ-ին և ՍԴՀԿ-ին պահել իրենց ազդեցության տակ՝ նաև հաշվի առնելով արևմտյան ուժերի (հատկապես ԱՄՆ-ի) հետևողական աշխատանքն այդ կուսակցությունների հետ:

Կարևոր է նշել նաև, որ տեղեկանքի հեղինակները բացի միջկուսակցական հարաբերություններում ազդեցություն գործելու ցանկությունից, կամենում էին միջամտել նաև ներկուսակցական հարաբերություններին՝ օգտագործելով կուսակցական գործիչներին: Մասնավորապես ՌԱԿ-ի պարագայում նրանք առաջարկում էին հաշվի առնել մրցակցությունը կուսակցության ղեկավար գործիչներ Գերսամ Ահարոնյան-Բարունակ Թովմասյան զույգի և Հայկաշեն Ուզունյանի միջև՝ աջակցելով երկրորդին, քանի որ նա բարեկամաբար էր տրամադրված Խորհրդային Հայաստանի նկատմամբ՝ միաժամանակ հեղինակություն վայելելով ամերիկամետ շրջանակներում: Հավանաբար նման կերպ վարվում էին նաև ՍԴՀԿ-ի ղեկավարների հետ հարաբերություններում, որովհետև առաջարկվում էր նաև չեղյալ անել հնչակյան և ռամկավար խորհրդայնամետ գործիչների նախատեսված այցը Խորհրդային Հայաստան, քանի որ այդ կուսակցությունների գալիք համագումարների շեմին նման այցը կարող էր ներկուսակցական ընդդիմությունների կողմից շահարկվել ընդդեմ նշված գործիչների:

Ելնելով փաստաթղթի բովանդակությունից՝ կարելի է նշել, որ սփյուռքահայ կազմակերպությունների նկատմամբ մոտեցումներում տեղի էր ունեցել մեծ փոփոխություն, քանի որ խորհրդային ազդեցությունը լիբանանահայ համայնքում և Լիբանանում ընդհանրապես հաստատելու ուղղությամբ նպատակահարմար էր դիտվում բարելավել հարաբերությունները նաև ՀՅԴ-ի հետ՝ հիմք ընդունելով Լիբանանի կոմունիստական կուսակցության և ԽՍՀՄ դեսպանության առաջարկությունը: Բայց հարաբերությունների բարելավումը չէր նշանակում աջակցել լիբանանահայ կուսակցությունների համաձայնությանը, հակառակը, դա պետք էր անել ՍԴՀԿ-ՌԱԿ խորհրդայնամետ միության ստեղծմամբ և ՀՅԴ-ի ԽՍՀՄ-ի նկատմամբ բարեկամաբար տրամադրված գործիչների հետ աշխատելու ճանապարհով:

Վերջնական կողմնորոշման համար անհրաժեշտ էր դիտվում երկու շաբաթով Բեյրութ գործուղել Կոմիտեի նախագահ Վ. Համազասպանին¹:

ԼԻԲԱՆԱՆԱՀԱՅՈՒԹՅԱՆ ՀԵՏ ԿԱՊԵՐԻ ՀԱՍՏԱՏՈՒՄՆ ՈՒ ԶԱՐԳԱՑՈՒՄԸ

Կոմիտեի ստեղծումը լայն արձագանք գտավ լիբանանահայության շրջանում: Լիբանանահայ «առաջադիմական» շրջանակները Կոմիտեի ստեղծումը համարում էին սփյուռքահայության նկատմամբ խորհրդահայ իշխանությունների հոգատարության նշան: Իսկ Կոմիտեի հիմնական առաքելությունը նրանք տեսնում էին հայապահպանության ասպարեզում²: Կոմիտեն նույնիսկ համարվում էր «անպաշտօն նախարարութիւն»³: Նրա ստեղծման կապակցությամբ շրջանառվում էր այն միտքը որ սփյուռքն ամբողջությամբ հույսը դնում է մայր հայրենիքի վրա⁴: 1970 թ. Բեյրութի «Խոսնակ» թերթը գրում էր, որ հայրենիքը բոլոր միջոցներով (ռադիո, մամուլ, գիրք, մշակութային կապեր, փոխայցելություններ) աջակցում է սփյուռքի լինելիության պայքարին⁵:

Տեղի կազմակերպություններն անմիջապես սկսեցին բոլոր հարցերով դիմել Կոմիտեի ղեկավարությանը՝ ներկայացնելով նաև սեփական գործունեության մասին տեղեկություններ⁶: Մուսալեռցիների հայրենակցական միությունը նույնիսկ դիմել էր Կոմիտե-

¹ Տե՛ս «Հայրենիք-սփյուռք. կամրջող անուն՝ Վ. Համազասպան», էջ 258-260:

² Տե՛ս «Զարթոնք», Բեյրութ, 10.09.1964:

³ Տե՛ս նույն տեղում, 11.09.1964:

⁴ Տե՛ս «Արարատ», Բեյրութ, 23.02.1966:

⁵ Տե՛ս «Խոսնակ», պաշտօնաթերթ Հ.Բ.Ը. միութեան, 1970, թիվ 4, էջ 121:

⁶ Տե՛ս ՀԱԱ, ֆ. 875, ց. 2, գ. 291, թ. 5 (Ստեցի երիտասարդների միության 14.08.1964 թ. գրությունը), նույն տեղում, թ. 1-2 (Հայագիտական ուսմանց Երուսաղ Հիւսիսեան հիմնարկի գրությունը 24.08.1964 թ.) և

ին՝ աջակցելու ՀԽՍՀ-ում մի բնակավայր «Նոր Մուսա լեռ» անվանակոչելուն աջակցելու խնդրանքով: Նրանք հույս ունեին, որ այդ անվանակոչումը տեղի կունենա 1965 թ., երբ լրանում էր Մուսա լեռան հերոսամարտի 50-ամյակը¹: Արդեն 1967 թ. հայրենակցական միությունն առաջարկում էր Մուսալեռ ավանում կառուցել 1915 թ. հերոսամարտը հավերժացնող հուշարձան միության միջոցներով²: Հուշարձանը Մուսալեռ ավանում կառուցվեց 1976 թ.: Նմանապես 1969 թ. Ուրֆայի հայրենակցական միությունն առաջարկում էր հայրենիքում Ուրֆայի անոնով մի պողոտա, արվարձան կամ թաղամաս անվանակոչել³: Ի պատասխան 1978 թ. Աշտարակի շրջանի 4-րդ սովխոզը կորվեց Նոր Եղեսիս⁴:

Իսկ Թեքեյան մշակութային միությունը Հայոց ցեղասպանության 50-րդ տարելիցի միջոցառումներին մասնակցելու նպատակով Լիբանան էր հրավիրում Վ. Համազասպյանին, ՀԽՍՀ ԳԱ նախագահ Վիկտոր Համբարձումյանին և երգչուհի Ջարուհի Դոլուխանյանին⁵:

Կոմիտեի հետ 1965 թ. գրական թեմայով կապ մեջ է եղել նաև ՀՅԴ-ի հայտնի գործիչ Կ. Սասունին⁶: Թեքեյան մշակութային միության ղեկավարությունը Կոմիտեից աջակցություն էր ակնկալում հիմնական խնդրի լուծման առումով. «Մեր դիմակայեած գլխավոր դժուարությունը հասարակական-ազգային գործիչներու եւ որակավոր ուսուցիչներու պակասն է: Ազգային կալուածը հետզհետէ անհրապոյր դառնալու վրայ է, եւ դժուար է այս մարգերուն համար ղեկավարներ պատրաստելը: ...Կոմիտէն կարող է մեզի եւ ամբողջ սփիւռքահայութեան օգնել վերոյիշեալ պակասներու լրացումով, եթէ հնարաւոր ըլլայ, մշակութային ու մարզական կապերու սերտացումով եւ գրականութիւն հայթայթելով»⁷:

Փոխայցեր: Փոխադարձ այցելությունները, որոնք Կոմիտեի աշխատանքներում մեծ տեղ էին զբաղեցնում, Լիբանանի դեպքում հաճախ կախված էին երկրի ներքաղաքական զարգացումներից: Կոմիտեի ստեղծումից անմիջապես հետո՝ 1965 թ., Լիբանան և Եգիպտոս են ուղարկվել Հայաստանի արվեստի շրջիկ ցուցահանդեսներ: Նույն ժամանակ Բեյրութում կազմակերպվել են հայկական կինոնկարների փառատոն և հայ գրքի ցուցահանդես: Այդ առիթով ուղարկվել են գրողներ, կինոգործիչներ, դերասաններ⁸:

1965 թ. Խորհրդային Հայաստան այցելեցին լիբանանահայ «առաջադիմական» մամուլի ներկայացուցիչները⁹:

1967 թ. սկզբին Լիբանանահայ գրական շրջանակը գրում էր Վ. Համազասպյանին՝ Մովսես Խորենացու ծննդյան 1500-ամյակի տոնակատարության առթիվ գործուղել Պարույր Սևակին կամ Գևորգ Էմինին՝ բանախոսության համար, ինչպես նաև «Կոմիտաս» խումբը՝ շրջագայության նպատակով, շուրջ 10 հոգուց բաղկացած արվեստագետների խումբը՝ ելույթներ ունենալու համար (նախընտրելի էին համարվում մնջախաղի վարպետ Լ. Ենգիբարյանը և երգչուհի Լ. Ջաքարյանը)՝ Կոմիտեի ներկայացուցչի ուղեկցությամբ¹⁰: Չնայած Վ. Համազասպյանը խոստանում էր, որ այցը կկայանա, բայց այն հետաձգվում էր, ուստի նրանք Պարույր Սևակին մեկ անգամ ևս հրավիրեցին նույն տարվա վերջին: 1968 թ. գրական շրջանակը Բեյրութ էր հրավիրում Վահագն Դավթ-

այլն: Այդ բնույթի գրությունները տե՛ս «Լիբանանահայ համայնքը 1915-1990 թվականներին», ըստ արխիվային փաստաթղթերի, խմբ. Ա. Վիրաբյան, Ե., 2017, էջ 141-151, 182-184 և այլն:

¹ Տե՛ս ՀԱԱ, ֆ. 875, ց. 2, գ. 545, թ. 10:

² Տե՛ս նույն տեղում, թ. 26:

³ Տե՛ս նույն տեղում, գ. 571, թ. 25-26:

⁴ Տե՛ս նույն տեղում, գ. 14, գ. 233, թ. 16:

⁵ Տե՛ս նույն տեղում, գ. 2, գ. 240, թ. 5-6:

⁶ Տե՛ս նույն տեղում, գ. 291, թ. 15-16:

⁷ Նույն տեղում, թ. 16:

⁸ Տե՛ս նույն տեղում, գ. 4, գ. 4, թ. 5:

⁹ Տե՛ս նույն տեղում, գ. 16, գ. 173, թ. 4:

¹⁰ Տե՛ս նույն տեղում, գ. 558, թ. 1-2:

յանին՝ Հ. Թումանյանի ծննդյան 100-ամյակի տոնակատարությունների շրջանակներում¹:

Կոմիտեի հետ համագործակցում էին նաև լիբանանահայ մշակութային խմբերը՝ հայրենիքում հյուրախաղերով հանդես գալու համար: Մասնավորապես 1968 թ. նման պայմանավորվածություն ձեռք բերվեց մի կողմից «Նոր սերունդ» մշակութային միության, «Լիբանանահայ մշակութային միության» և Գրական շրջանակի, իսկ մյուս կողմից Կոմիտեի միջև: Ի վերջո նրանց այցը հնարավոր չեղավ իրականացնել ծրագրերի փոփոխության պատճառով²:

1970 թ. դեկտեմբերի 21-ից մինչև 1971 թ. հունվարի 22-ը Լիբանանում էր Վ. Համազասպյանը: Նրան միացյալ հրավիրել էին Լիբանանահայ գրական շրջանակը, «Նոր սերունդ» մշակութային միությունը և Թեքեյան մշակութային միությունը՝ Խորհրդային Հայաստանի 50-ամյակի տոնակատարությանը մասնակցելու³:

1971 թ. հունվարին Հայկազյան քոլեջը դիմեց Կոմիտեին՝ 1971-1972 տարեշրջանում համար հայագիտության ամբիոն գործուղել հայոց լեզվի ու գրաբարի մասնագետ: Նրանք առաջարկում էին գործուղել Է. Աղայանին⁴:

1971 թ. Վ. Համազասպյանին է դիմում Հայ մարմնակրթական միության Բեյրութի շրջանի վարչությունը՝ միության 50-ամյակի առիթով Բեյրութ գործուղելու պաշտոնական ներկայացուցիչներ Խորհրդային Հայաստանից, ինչպես նաև մարզական, երիտասարդական և արվեստագետների պատվիրակություններով: Ի պատասխան Կոմիտեի նախագահի տեղակալը խոստանում էր հաշվի առնել հրավերը, բայց նաև առաջարկում հրավիրել Երևանի «Արարատ» ֆուտբոլային թիմին, որը նոյեմբերին մեկնելու էր Սիրիա⁵:

Խնդիրներից շատերը սակայն իսկույն լուծում չէին գտնում: Մասնավորապես Երվանդ Հյուսիսյան հայագիտական հիմնարկի 1964 թ. խնդրանքը՝ հիմնարկ գործուղելու հայագետ դասախոս գործուղելու վերաբերյալ⁶ լուծում չէր գտել և 1971 թ. հիմնարկից դարձյալ գրում էին Կոմիտեի նախագահին այդ մասին: Նրանք առաջարկում էին միջանկյալ լուծում. քանի որ 1971-1972 տարեշրջանում դասավանդելու նպատակով Հայկազյան քոլեջ էր գործուղվելու Է. Աղայանը, կարելի էր քոլեջի տնօրինությանը զգուշացնել, որ նա շաբաթը 3 ժամ պետք է դասախոսի նաև Հայագիտական հիմնարկում: Ի պատասխան Վ. Համազասպյանը գրում էր, որ քոլեջի դասախոսի հարցը լուծելիս հաշվի կառնվի նրանց առաջարկը⁷: Ի վերջո խնդիրը չլուծվեց:

1972 թ. Կոմիտեն հյուրընկալել է մշակութային միությունների ներկայացուցիչների: Կոմիտեն ընդունել է նաև Լիբանանի «Հայ ասպետներ»-ի «Յուլդարցիների հայրենակցական միության», «Մուսալեռցիների հայրենակցական միության» և Թուրքիայից, Իրաքից, Սիրիայից ժամանած հայ տուրիստական բազմաթիվ խմբերի⁸: Փոխադարձաբար «Լիբանանի գրական շրջանակի» կողմից կազմակերպված հայկական ֆիլմերի փառատոնին մասնակցելու համար 1972 թ. փետրվարի 26-ից Լիբանան է մեկնել ՀՍՍՀ կինոմատոգրաֆիայի պետական կոմիտեի նախագահ Գևորգ Հայրյանը, ռեժիսոր Հենրիկ Մայրանը և դերասան Սոս Սարգսյանը: Փառատոնի ընթացքում ցուցադրվել է 8 գեղարվեստական, 9 վավերագրական և 4 մուլտիպլիկացիոն հայկական կինոնկարներ: 1972 թ. Հայաստանի թատերական ընկերության մասնագիտացված խումբը մեկնել է Լիբանան և բազմաթիվ հանդիպումներ ունեցել հայ համայնքի տարբեր շրջանակների հետ⁹:

¹ Տե՛ս նույն տեղում, թ. 3-14:

² Տե՛ս նույն տեղում, թ. 11-12:

³ Տե՛ս «Լիբանանահայ համայնքը 1915-1990 թվականներին», ըստ արխիվային փաստաթղթերի, էջ 448, ծանոթ. 402:

⁴ Տե՛ս ՀԱԱ, ֆ. 875, ց. 4, գ. 313, թ. 21:

⁵ Տե՛ս նույն տեղում, գ. 316, թ. 16-17:

⁶ Տե՛ս նույն տեղում, գ. 2, գ. 291, թ. 1-2:

⁷ Տե՛ս նույն տեղում, գ. 4, գ. 316, թ. 49-50:

⁸ Տե՛ս նույն տեղում, գ. 6, գ. 3, թ. 5-7:

⁹ Տե՛ս նույն տեղում, թ. 17-19:

Գրական շրջանակի հրավերով այդ տարի Բեյրութ է մեկնել Կոմիտեի մամուլի բաժնի աշխատակից, բանաստեղծ Ռ. Դավոյանը: Նրա ստեղծագործությանը նվիրված երեկոյին ներկա են եղել տարբեր շրջանակների շուրջ 50 ներկայացուցիչներ¹:

Կոմիտեն լիբանանահայ համայնքի հետ կապերի ամրապնդման նպատակով խրախուսում և ներկայացնում էր համայնքի մշակութային գործիչների ստեղծագործությունները Երևանում: Այդպես 1973 թ. կազմակերպվեց լիբանանահայ նկարիչ Ա. Դարբինյանի գործերի ցուցահանդեսը²:

Կոմիտեն 1975 թ. ակտիվորեն զբաղվեց նաև Բեյրութի «ՀՄՄ-Մասիս» երիտասարդական կազմակերպության հրավերով Երևանի ֆուտբոլի մասնագիտացված դպրոցի պատանեկան թիմը (20-22 հոգի) Բեյրութ գործուղելու աշխատանքով³: Ի պատասխան Կոմիտեն նույն թվականին հայրենիք հրավիրեց լիբանանի «Արարատ» և «Էրեբունի» ակումբների ֆուտբոլի պատանեկան թիմերին: «Ելնելով բարեկամ կազմակերպությունների գործունեության խրախուսման և պրոպագանդման նկատառումներից, Կոմիտեն ծրագրել է ընթացիկ տարում 10 օրով Հայրենիք հրավիրել «Արարատ» և «Էրեբունի» թիմերի 20 հոգուց բաղկացած մարզական պատվիրակություն»⁴:

1975 թ. ապրիլից շուրջ մեկուկես տարի լիբանանում մեծ չափով սրվեց քաղաքացիական պատերազմը, որի հետևանքով Կոմիտեի աշխատանքները շատ ուղղություններով խափանվեցին: Համայնքային կյանքը գրեթե ամբողջովին կանգ առավ: Վ. Համազասպյանը ՀԿԿ կենտրոնական կոմիտեին տեղեկացնում էր, որ շուրջ 250 հազարանոց լիբանանահայ համայնքը ծանր վիճակում է և օգնություն է ստանում բոլոր կողմերից: Ամենայն հայոց կաթողիկոս Վազգեն Ա-ն իր միջոցներից աղետյալ համայնքին հատկացրել է 20 հազար դոլար և կոչ արել բոլոր համայնքներին՝ աջակցելու լիբանանահայ կարիքավոր ընտանիքներին⁵: Կոմիտեն առաջարկում էր Կարմիր խաչի միջոցով օգնություն տրամադրել լիբանանի ժողովրդից, որը բաժին կհասնի նաև հայացքը հայրենիքին հառած լիբանանահայությանը: Կոմիտեն առաջարկում էր նաև թույլատրել իր միջոցներից և իր տնօրինության տակ դրված կտակներից բաժին հանել լիբանանահայերին: Մյուս կողմից անհրաժեշտ էր դիտվում հայրենիք բերել լիբանանահայ երեխաների: Ի միջի այլոց դա բարձրացնելու էր Խորհրդային Հայաստանի հեղինակությունը սփյուռքահայության աչքում⁶:

Սակայն նույնիսկ այդ վիճակում փոխայցելությունները շարունակվում էին: Համապատասխանաբար 1976 թ. և 1978 թ. ՀԽՍՀ են այցելել լիբանանի Կոմունիստական կուսակցության կենտրոնական կոմիտեի անդամներ Հ. Մադեյանը և Գ. Ադդարյանը⁷:

1977 թ. Թեքեյան մշակութային միությունը Վ. Թեքեյանի ծննդյան 100-այակի առիթով հայրենիքից հյուրեր էր հրավիրում, որոնց թվում՝ Կոմիտեի նախագահ Վ. Համազասպյանը⁸: Վերջինս սակայն լիբանան մեկնեց 1978 թ.՝ քաղաքացիական պատերազմի վնասներին տեղում ծանոթանալու նպատակով⁹:

1979 թ. Սիրիայից և լիբանանից Խորհրդային Հայաստան է հրավիրվել 10 հոգանոց աշխատավորական պատվիրակություն: Իսկ սեպտեմբեր-հոկտեմբերին հրավիրել են «առաջադիմական» թերթերի խմբագիրների և նշանավոր լրագրողների: Հրավիրել են նաև կանանց, երիտասարդների և գիտության ներկայացուցիչների¹⁰:

¹ Տե՛ս նույն տեղում, ց. 6, գ. 3, թ. 7:

² Տե՛ս նույն տեղում, ց. 5, գ. 17, թ. 12:

³ Տե՛ս նույն տեղում, ց. 6, գ. 12, թ. 7:

⁴ Նույն տեղում, թ. 8:

⁵ «Հայոց Հայրապետի հայրական կոչը լիբանանի կարիքավոր հայ ընտանիքներին օգնելու համար», «Էջմիածին», պաշտօնական ամսագիր Հայրապետական Աթոռոյ Ս. Էջմիածնի, 1975, թիվ 11, էջ 8-10:

⁶ Տե՛ս ՀԱԱ, ֆ. 875, ց. 6, գ. 23, թ. 1-2:

⁷ Տե՛ս նույն տեղում, ց. 14, գ. 30, թ. 3:

⁸ Տե՛ս նույն տեղում, ց. 8, գ. 153, թ. 44-45:

⁹ Տե՛ս նույն տեղում, գ. 26, թ. 5:

¹⁰ Տե՛ս նույն տեղում, գ. 157, թ. 1:

1980 թ. Կոմիտեի խողովակով Երևան ժամանեց Բեյրութի Հայկազյան քոլեջի պատվիրակությունը¹:

Խորհրդային Հայաստանի ստեղծման 60-ամյակի տոնակատարությանը Բեյրութում մասնակցելու համար Կոմիտեն Լիբանան գործուղեց արվեստագետների խումբ՝ Կոմիտեի նախագահի տեղակալ Վահագն Դավթյանի գլխավորությամբ: Խմբի մեջ մտնում էին երգչուհի Բելլա Դարբինյանը և դուդուկահար Ջիվան Գասպարյանը²: Միևնույն ժամանակ Լիբանան հրավիրվեց գրող Սերո Խանգադյանը³:

Բեյրութի «Թեքեյան» մշակութային միության ատենադպիրը մասնակցեց 1981 թ. Երևանում կայացած սփյուռքահայ մամուլի ներկայացուցիչների և թերթերի ու ամսագրերի խմբագիրների սեմինար-խորհրդակցությանը, իսկ հոկտեմբերին Երևան այցելեցին մշակութային միության ղեկավարները⁴: 1981 թ. մայիսմեկյան միջոցառումներին մասնակցելու համար հայրենիք հրավիրվեց 7 հոգանոց պատվիրակություն Սիրիայից և Լիբանանից: Նույն թվականին Կոմիտեն գործնական օգնություն է ցույց տվել լիբանանահայ գործիչ Հովհաննես Ջերեջյանին (Շիրազ), որը ՀԽՍՀ էր ժամանել «Վերածնված Հայաստան» խորագրով վավերագրական կինոնկար ստեղծելու նպատակով⁵:

Փոխայցերի շրջանակներում պատվիրակությունների կազմում հաճախ էին ընդգրկվում Կոմիտեի ներկայացուցիչներ: 1982 թ. Կոմիտեի գծով Մերձավոր Արևելքի երկրներ մեկնող տուրիստական խմբի կազմում ընդգրկվեց Կոմիտեի 4 աշխատակից⁶:

1984 թ. Լիբանանի հայ համայնքից երկու փուլով ՀԽՍՀ են հրավիրվել 8 հոգի՝ հայրենի երկրի ձեռքբերումներին ծանոթացնելու համար⁷: Նույն թվականի մայիսմեկյան տոնակատարություններին մասնակցելու համար հրավիրվել է 3 հոգի: Այնուհետև Լիբանան է գործուղվել Կոմիտեի մեկ աշխատակից⁸:

Կոմիտեն նաև հոգ էր տանում, որ հայրենիքում բուժում ստանան քաղաքացիական պատերազմից տուժածները: 1977 թ. Լիբանանից ժամանած 30 հասարակական գործիչներ բուժում են ստացել ՀԽՍՀ բուժփմնարկներում⁹: 1979 թ. ՀԽՍՀ-ում բուժման կուրս են ստացել ևս 40 լիբանանահայեր¹⁰: 1981 թ. Լիբանանից բուժման նպատակով հրավիրվել է 10 հոգի¹¹:

ՄԱՐԴԱՍԻՐՎԿԱՆ ԵՎ ԱՅԼ ԱՌԱՔՈՒՄՆԵՐ

Կոմիտեն իր գոյության առաջին իսկ տարում՝ 1964 թ. Երվանդ Հյուսիսյանի հայագիտական ուսմանց հաստատությանն է ուղարկել շուրջ 500 կտոր արժեքավոր հայագիտական գրականություն, ինչպես նաև բազմաթիվ թերթեր ու ամսագրեր¹²:

Լիբանանահայ «առաջադիմական» դպրոցներն իրենց բաժինը ստացան 1965 թ. Մերձավոր Արևելք ուղարկված 11 լրակազմ (կոմպլեկտ) ֆիզիկայի լաբորատորիաներից¹³:

Երկար տարիներ շարունակ լիբանանահայությունը ծանր կորուստներ էր կրում քաղաքացիական պատերազմից: Այդ իսկ պատճառով լիբանանահայությանն օգնության տրամադրման աշխատանքների կազմակերպումը ստանձնում է Կոմիտեն: 1977 թ. նոյեմբերին Վ. Համազասպյանը գրում էր ՀԽՍՀ մինիստրների խորհրդին՝ լիբանանահայության համար նախատեսված օգնությունն առաքելու խնդրանքով: Վերջինիս

¹ Տե՛ս նույն տեղում, ց. 14, գ. 233, թ. 4:

² Տե՛ս նույն տեղում, թ. 35:

³ Տե՛ս նույն տեղում, թ. 44:

⁴ Տե՛ս նույն տեղում, գ. 14, թ. 23:

⁵ Տե՛ս նույն տեղում, թ. 34:

⁶ Տե՛ս նույն տեղում, գ. 55, թ. 2:

⁷ Տե՛ս նույն տեղում, ց. 13, գ. 24, թ. 7, 10:

⁸ Տե՛ս նույն տեղում, թ. 26:

⁹ Տե՛ս նույն տեղում, ց. 8, գ. 14, թ. 10:

¹⁰ Տե՛ս նույն տեղում, ց. 16, գ. 173, թ. 2:

¹¹ Տե՛ս նույն տեղում, գ. 6, թ. 1:

¹² Տե՛ս նույն տեղում, ց. 1, գ. 36, թ. 7:

¹³ Տե՛ս նույն տեղում, ց. 4, գ. 6, թ. 4:

ծավալը կազմում էր 100 հազար ռուբլի, ընդ որում՝ «22 դպրոցական լաբորատորիա (10 կենսաբանության, 8 ֆիզիկայի, 4 քիմիայի), 10 դաշնամուր, 46 կինոապարատ, սպորտային հանդերձանք ու գույք, հեծանիվներ, հեռուստացույցեր, գրենական պիտույքներ, ֆոտոապարատներ, մանկապարտեզի խաղալիքներ, առաջին բուժօգնության արկղիկներ և այլն»¹: 1977 թ. կեսերին արդեն իրավիճակը Լիբանանում հանդարտվել էր, իսկ հայ համայնքային կյանքը վերականգնվել:

1978 թ. մայիս-հունիսին օգնությունն իրացնելու նպատակով Բեյրութ գործուղվեցին Կոմիտեի Արևելյան երկրների բաժնի վարիչ Ռ. Կոզմոյանը և ավագ խորհրդական Ս. Նադրյանը: Օգնությունը տեղափոխվեց Օդեսայից նավով: Նախապես ճշտվել էին կարիքավորները: Կոմիտեի ներկայացուցիչները եղան լիբանանահայ բոլոր հայաշատ բնակավայրերում: Օգնությունը դպրոցներին բաշխվում էր՝ առանց հաշվի առնելու նրանց «առաջադիմական» կամ դաշնակցական» լինելը: Խորհրդային Հայաստանից ուղարկված օգնությունից բաժին հասավ լիբանանահայ բոլոր աղետյալ խմբերին²:

Սակայն 1979 թ. իրավիճակը դարձյալ կտրուկ սրվեց: Բեյրութի ռմբակոծությունների հետևանքով բազմաթիվ հայկական կրթական ու մշակութային օձախներ քանդվեցին: Իրավիճակին ծանոթանալու և օգնության չափը ճշտելու առաքելությամբ Լիբանան մեկնեց Վ. Համազասպյանը: Այնուհետև Փետրվարի 19-ից մինչև մարտի 3-ը խորհրդային օդանավները 23 չվերթով Լիբանան հասցրեցին նախատեսված օգնությունը³: Անմիջապես հատուկ օգնությունը բաշխելու նպատակով ստեղծված մարմինը սկսեց այն բաշխելու աշխատանքները⁴: Օգնությունից բաժին հասավ շուրջ 30 հազար հայի⁵:

1979 թ. հունվար ամսին Լիբանանի համայնքի վիճակի, նրա կարիքների և հայրենիքի կողմից ցույց տրվող օգնության ճիշտ կազմակերպման նպատակով Լիբանան է գործուղվել 3 հոգուց կազմված պատվիրակություն՝ Վ. Համազասպյանի գլխավորությամբ: Նույն պատվիրակությունը օգնության նպատակով Լիբանան է մեկնել նաև օգոստոսին⁶: Նախատեսվում էր նաև օգնություն տրամադրել պատերազմից տաժած դպրոցներին, սպորտային ու մշակութային ակումբներին, մամուլին և այլն, նրանց առաքել դասագրքեր, գրականություն, իսկ մամուլի օրգանների համար տպագրական սարքեր, թուղթ և այլն⁷:

Հետաքրքրական է, որ լիբանանահայության ներկայացուցիչները ևս նվիրատվության կարգով Խորհրդային Հայաստանին են փոխանցել տարբեր սարքավորումներ: 1982 թ. Դեմիրջյան եղբայրները նվիրել են արտասահմանյան արտադրության տպող և դրոշմող սարքավորումներ: 1983 թ. Չևորգ Մոմջյանը Հայաստանին է նվիրել 700 հազար դոլար արժողությամբ ժամանակակից սարքավորում⁸:

ԿՈՄԻՏԵԻ ԳՈՐԾՈՒՆԵՈՒԹՅՈՒՆԸ ԼԻԲԱՆԱՆԱՀԱՅ ՌԻՍՈՒՑԻՉՆԵՐԻ ՎԵՐԱՊԵՏՈՒԹՅԱՆ ԵՎ ԵՐԻՏԱՍԱՐԴՈՒԹՅԱՆ ԱԶԱԿՑԵԼՈՒ ՈՒՂՈՒԹՅԱՄԲ

Ուսուցիչների վերապատրաստում: Քանի որ լիբանանահայությունը սփյուռքի ամենամեծաքանակ դպրոցներ ունեցող համայնքներից էր, այնտեղից Խորհրդային Հայաստան վերապատրաստման մեկնող ուսուցիչների թիվն էլ բավականին մեծ էր: Բայց անընդհատ սրվող քաղաքացիական կռիվների պատճառով հաճախ հնարավոր չէր լինում կազմակերպել այդ գործընթացը, որի իրականացման պատասխանատվությունը կրում էր Կոմիտեն: 1965 թ. վերապատրաստման նպատակով Հայաստան հարվիրվեց լիբանանահայ 10 ուսուցիչ⁹: 1967 թ. վերապատրաստման համար Լիբանանից Խոր-

¹ Նույն տեղում, ց. 8, գ. 8, թ. 63:

² Տե՛ս նույն տեղում, ց. 9, գ. 15, թ. 15-18:

³ Տե՛ս նույն տեղում, գ. 20, թ. 4-6:

⁴ Տե՛ս նույն տեղում, թ. 6-10:

⁵ Տե՛ս նույն տեղում, թ. 2:

⁶ Տե՛ս նույն տեղում, ց. 16, գ. 173, թ. 1-2:

⁷ Տե՛ս նույն տեղում, ց. 8, գ. 166, թ. 1:

⁸ Տե՛ս նույն տեղում, ց. 16, գ. 6, թ. 2-3:

⁹ Տե՛ս նույն տեղում, ց. 1, գ. 26, թ. 20:

հրդային Հայաստան եկան 8, 1970 թ.՝ 11 (նախատեսված 6-ի փոխարեն), 1971 թ.՝ 13¹, 1972 թ.՝ 14 (նախատեսված 7-ի փոխարեն՝ անհատական խնդրանքներով)², 1972 թ.՝ 6, 1975 թ.՝ 1 (նախատեսված 8-ի փոխարեն), 1976 թ.՝ 8, 1977 թ.՝ 7³, 1978 թ.՝ 7⁴, 1979 թ.՝ 12, 1980 թ.՝ 11⁵, 1981 թ.՝ 10, 1982 թ.՝ 12 (նախատեսված 10-ի փոխարեն), 1984 թ.՝ 10 և 1985 թ.՝ 12⁶ հայ ուսուցիչներ⁷:

ՀԽՍՀ բուհերում լիբանանահայ երիտասարդների ուսման կազմակերպումը: Սփյուռքահայ և մասնավորապես լիբանանահայ երիտասարդության ուսման կազմակերպումը ՀԽՍՀ բուհերում եղել է Կոմիտեի մշտական մտահոգություններից մեկը: Մինչև 1970 թ. ՀԽՍՀ բուհերում ուսանել է 70 լիբանանահայ⁸: Հետաքրքրական է, որ Կոմիտեի ծրագրերում լիբանանահայ ուսանողների հաշվարկը սկսվում է 1968 թվականից: 1968-69 ուստարում լիբանանահայ ուսանողների թիվը խորհրդահայ բուհերում և տեխնիկումներում 100 էր⁹: 1978-79 ուստարում նրանց թիվը 17 էր (որից ինժեներություն էր սովորում 4, բժշկություն՝ 4, մշակույթ՝ 1, մանկավարժություն՝ 1 ուսանող¹⁰): Մինչև 1980 թ. Լիբանանից ՀԽՍՀ բուհերում սովորող հայ ուսանողների թիվը համեմատաբար փոքր էր՝ 1970 թ.՝ 15, 1971 թ.՝ 14, 1976 թ.՝ 17 և 1978 թ.՝ 12¹¹: 1980 թ. իրավիճակը փոխվեց: Այդ տարի խորհրդահայ բուհեր ընդունվեցին լիբանանահայ 40 երիտասարդներ: Հետագա մի քանի տարիներին այդ բարձր ցուցանիշը պահպանվեց. 1981 թ. ՀԽՍՀ բուհեր ընդունվեցին լիբանանահայ 40, 1982 թ.՝ 39, 1985 թ.՝ 38 (2-ը ասպիրանտ) երիտասարդներ¹²:

Ուղիհանուր առմամբ 1958-1980 թթ. ՀԽՍՀ բուհերում սովորել է 227 լիբանանահայ երիտասարդ: Դա երկրորդ ցուցանիշն էր սիրիահայ երիտասարդներից հետո¹³:

Երեխաների հանգստի կազմակերպումը ՀԽՍՀ ճամբարներում: Հատկապես տպավորիչ էին ՀԽՍՀ-ում հանգստ անցկացնող լիբանանահայ երեխաների թվերը: Այսպես՝ 1970 թ. ՀԽՍՀ-ում հանգստացել են լիբանանահայ 27 (նախատեսված 20-ի փոխարեն), 1976 թ.՝ 15, 1977 թ.՝ 15¹⁴ (թեև նախատեսված չէր¹⁵), 1978 թ.՝ 35¹⁶, 1980 թ.՝ 90¹⁷, 1981 թ.՝ 90 (նախատեսված 80-ի փոխարեն), 1982 թ.՝ 80, 1983 թ.՝ 108 և 1984 թ.՝ 70 երեխաներ: 1985 թ. արդեն Լիբանանից դպրոցականներ չեն այցելել, թեև նախատեսված էր 70 երեխաների հանգստ ՀԽՍՀ-ում¹⁸:

Հետաքրքրություն են ներկայացնում նաև հայրենիքում լիբանանահայ երեխաների հանգստի կազմակերպման պայմանները: Օրինակ 1976 թ. Կոմիտեն հաշվի առնելով լիբանանահայ երեխաների ծանր վիճակը՝ Լիբանանի կոմկուսի կենտկոմի քաղբյուրոյին գրում էր, որ այդ տարի նախատեսվում էր Լիբանանից հայրենիք տանել 8-14 տարեկան 5 երեխա, որոնց ժամանելու ծախսը պետք է հոգային նրանց ընտանիքները, իսկ հայրենիքում բոլոր ծախսերը և վերադարձի ծախսը՝ Կոմիտեն¹⁹:

¹ Տե՛ս նույն տեղում, ց. 16, գ. 3, թ. 3:

² Տե՛ս նույն տեղում, ց. 5, գ. 12, թ. 39-40:

³ Տե՛ս նույն տեղում, ց. 8, գ. 7, թ. 16:

⁴ Տե՛ս նույն տեղում, գ. 31, թ. 33:

⁵ Տե՛ս նույն տեղում, ց. 5, գ. 26, թ. 86:

⁶ Տե՛ս նույն տեղում, ց. 16, գ. 192, թ. 47:

⁷ 1983 թ. վերաբերյալ տվյալներ գտնել չհաջողվեց:

⁸ Տե՛ս ՀԱԱ, ֆ. 875, ց. 6, գ. 1, թ. 1-5:

⁹ Տե՛ս նույն տեղում, ց. 3, գ. 10, թ. 5:

¹⁰ Տե՛ս նույն տեղում, ց. 8, գ. 31, թ. 13:

¹¹ Մյուս թվականների մասին տվյալներ գտնել չհաջողվեց:

¹² Տե՛ս ՀԱԱ, ֆ. 875, ց. 16, գ. 192, թ. 92:

¹³ Տե՛ս Մելիքսեթյան Հ., Հայրենիք-Սփյուռք առնչությունները և հայրենադարձությունը (1920-1980 թթ.), Ե., 1985, էջ 428: Տե՛ս նաև «Սովետական Հայաստան», 1980, թիվ 12, էջ 22-23:

¹⁴ Տե՛ս ՀԱԱ, ֆ. 875, ց. 8, գ. 14, թ. 10:

¹⁵ Տե՛ս նույն տեղում, գ. 7, թ. 16:

¹⁶ Տե՛ս նույն տեղում, գ. 31, թ. 34:

¹⁷ Տե՛ս նույն տեղում, ց. 9, գ. 26, թ. 85:

¹⁸ Տե՛ս նույն տեղում, ց. 16, գ. 192, թ. 16:

¹⁹ Տե՛ս նույն տեղում, ց. 8, գ. 146, թ. 14:

Հայրենադարձությունը: Կոմիտեի գործունեության շրջանում ոչ առանց նրա աջակցության ՀԽՍՀ է ներգաղթել 6795 ընտանիք (31920 մարդ)¹: Կապված հիմնականում անբարենպաստ իրավիճակի հետ, ինչպես նաև հաշվի առնելով տարաբնույթ այլ հարցեր (համայնքի կազմակերպական առանձնահատկությունները, պետության հարուցած դժվարությունները և այլն) Լիբանանից ներգաղթողների մեծ հոսք չեղավ: 1962-1982 թթ. Լիբանանից ՀԽՍՀ է ներգաղթել ընդամենը 113 ընտանիք (378 մարդ), որը վեցերորդ ցուցանիշն էր²:

Փաստորեն Կոմիտեի համագործակցությունը լիբանանահայության և մասնավորապես նրա կազմակերպությունների հետ խորը և բազմակողմանի էր: Հատկապես հաշվի առնելով Լիբանանում տիրող բարդ ներքաղաքական պայմանները՝ Կոմիտեն ոչ միայն համագործակցել է լիբանանահայության հետ, այլ հայության այդ վտանգված հատվածին հատկացրել մեծածավալ օգնություն:

Мелик Овсепян, Сотрудничество Комитета по культурным связям с армянами диаспоры с Армянской общиной Ливана. Комитет по культурным связям с армянами диаспоры с первых дней своей работы с армянами Ливана столкнулся с проблемами, которые по сути предрешили направление сотрудничества.

Исходя из сложного внутривосточного состояния в Ливане Комитет пытался всячески помогать общине. Комитет организовал объёмную гуманитарную помощь организациям Армянской общины Ливана. И хотя первоначально помощь предназначалась только для так называемых патриотических организаций, но в конце концов помощь получили и остальные организации.

В течении двух десятилетий Комитет содействовал учебе ливанской армянской молодежи в вузах Советской Армении, организовал отдых детей в лагерях и участие учителей на ежегодных курсах обучения.

Ключевые слова: Комитет, армяне диаспоры, армянская община Ливана, помощь, контакты, визиты, учеба, отдых, лечение, партнер.

Melik Hovsepyan, Cooperation of the Committee of Cultural Relations with the Diaspora Armenians with the Armenian community of Lebanon. The Committee on Cultural Relations with the Diaspora Armenians from the first days of its works with the Armenians of Lebanon faced problems that essentially predetermined the direction of cooperation.

Based on the complex internal political situation in Lebanon, the Committee tried to help the community in every way. The Committee organized extensive humanitarian assistance to organizations of the Armenian community of Lebanon. Although initially the assistance was intended only for the so-called patriotic organizations, in the end, the rest of the organizations also received assistance.

For two decades, the Committee assisted Lebanese Armenian youth in universities of Soviet Armenia, organized recreation for children in camps and the participation of teachers in annual training courses.

Key words: Committee, Diaspora Armenians, Armenian community of Lebanon, assistance, contacts, visits, studies, recreation, treatment, partner.

¹ Տե՛ս Մելիքսեփյան Հ., նշվ. աշխ., էջ 299:

² Տե՛ս նույն տեղում: